



Aqqalu C. Jerimiassen

UKA 2022/56

Atassut

20. oktober 2022

**Ukioq 2025-imiit nutaamik umiarsuarmik sinersortaateqalernissaa siunertaralugu Naalackersuisut pilersaarummik suliaqarnissaannik Inatsisartut aalajangiiffigisassaattut siunnersuut, taamaasilluni pilersaarut kingusinnerpaamik UKA 2023-imi saqqummiunneqassaaq.**

(Inatsisartunut ilaasortaq Anders Olsen, Siumut)

UPA2019-imi imm.134 Atassummiit siunnersuut imannak qulequtaqarpoq: ” Umiarsuarmik ilaasortaammik sinersortaammik Nanortalimmiit Upernavimmut angalasoqarsinnaasunngorlugu 2020-miit ataatsimik umiarsualiisoqaqqinnissaanik sulissuteqaqqullugit Naalackersuisut peqqunneqarnissaannik Inatsisartut aalajangiiffigisassaattut siunnersuut. Inatsisartunut ilaasortaq Aqqalu C. Jerimiassen, Atassut”.

Taannalu siunnersuut ajoraluartumik ataatsimiitsitaliamit isumaqatigiittumit aappassaaneerneqartussanngornermini itigartinneqarnissaa innersuussutigineqarsimavoq.

Aatsaat maanna qaatuaqisoqaleqqissimanerpa? Taamatut apererusunnaqqaarpoq aallaqqaammut.

Tassami taamanikkut ajoraluartumik ataatsimiitsitaliaq allannguutissaasinnaasumilluunniit siunnersuuteqanngilaq.

Siunnersuut maanna una tapersernaraluarpoq, paasiuminaapporli sooq ukiunik pingasunik kinguarsaqaartariaqarsimansoq. Immaqa partiip sorliup suna pinnassaneraa erfalasimaarnissaq pinerullugu?

Neriutigiinnartariaqarparpullu maanna, siunnersuummi uani qanoq tamatta suleqatigiiffeqarsinnaanitta ujartornissaa.

Inuussutissarsiornikkummi mittarfissuit naammassiartuaarneranni, ingasammik qeqertarsuup tunuani takornariaqarnikkut ineriartortitsipiloornissamik siunertaqarnermi umiarsuakkut angallannermik eqaattumik peqarnissaa avaqqunneqarsinnaanngilluinnartussaammat.

Minnerunngitsumillu, inoqarfiit tikinneqartarsimangaluartut nunatta kujataani, taamatullu avannaani tikinneqassaarsimasut ujartuisarnerat naluneqanngimmat.

Ilulissani piffissap takornariaqarfiulluarfiata nalaani silaannakkut angallannermi inoqarfinnit allanit avannaanit innuttaasunut inissaqarnikkut eqquisareerpoq. Sinersortaateqarnikkullu, inuppassuarnik

ataatsimoornermik annertuumik misigiffiusartunik peqaleqqinnikkut, aasaanerani Upernavik tikillugu sinersortoqalerneratigut arlalissuartigut aaqqiissutissatsialaasinnaaqaaq. Uagummi maanna 40-it tungaanut ingerlasuusut angumerivarput, nunarput tamakkerlugu sinersortaateqarnikkut annertuumik angallaneq. Maannali tamanna meeqqatsinnut misigitissinnaangilarput, silaannakkut angallaneq annertuumik isumalluutigilernikuuarpud, oqarusuppugullumi soorunami aamma tamanna akerlerinngilluinnarparput. Sulilu inerisarneqarnerunissaanut tapersersuilluta.

Imaatigulli sinersorneq piuneerutitingajavinneqarsimasoq, kingumut eqaallisaavigineqarneratigut, Atassummiit isumaqarpugut tassani inuiaqatigiittut annaasassaqaqngivilluta.

Angallannikkummi inerisaaqqinnerit mittarfissat naammassigaluttualerneranni pissusissamisuuinnartutut isigineqarsinnaanissaat piviusorsioortuusorinarsinnaavoq.

Maanna sinersortaatituarisarpud, Sarfaq Ittuk ila pisoqasaannguanguveqaaq, nutaanerusunillu marlunnilluunniit sinerissatsinni ataavartumik angalasussanik pilersitsinissaq misissorneqarsinnaanissaa soqutiginarluinnartuuvoq. Immaqalu ilaatigut eqqarsaatigineqarsinnaallunittaaq, ilumut Arctic Umiaq Line immikkut suliffeqarfiusariaqarnersoq, imaluunniit Royal Arctic Line-ip ataani immikkoortuinnanngorluni ingerlalersinnaanera?

Taamaangippat namminersortunut tamakkiisumik imaatigut sinersortaateqarnikkut angallaneq tunniunneqarsinnaanersoq soqutiginaatilittut misissorneqarsinnaasunuttaaq ilaalluarpoq.

Atassummiit taamatut oqaaseqarluta, siunnersuut Sanaartornermut ataatsimiitsitaliamut innersuupparput.